

10 sebab

mengapa anda patut menyokong Liga-S musim ini

Bahang Liga-S Great Eastern-Yeo's kian dirasai menjelang perlawanan pembuka tirai Sabtu ini. Berbeza daripada musim-musim yang sudah, suasana yang menyelubungi musim ke-21 ini lebih positif dan lebih menarik perhatian. Ayuh, luangkan masa, turun ke stadium dan beri sokongan padu kepada kelab kegemaran anda.



1. Permulaan era baru

Walau Liga-S bergelut menarik penonton kebelakangan ini, ada 'keghairahan' baru yang mengiringi suasana pramusim kali ini. Beberapa perlawanan persahabatan setakat ini berjaya menarik lebih 1,000 penonton – serupa jumlah penonton purata di Liga-S musim lalu. Ketua Pegawai Eksekutif (CEO) Liga-S Lim Chin memberitahu akhbar ini bahawa beliau berasa optimistik momentum hebat ini akan berterusan sepanjang musim.

2. Lebih kompetitif

Pembubaran LionsXII – yang tidak dibenarkan beraksi lagi di Liga Super Malaysia (MSL) musim ini – bermakna sekitar 25 pemain, kebanyakannya pemain nasional, kini menyuarung jersi kelab Liga-S setempat. Penjaga gawang nasional Izwan Mahbud kini mewakili Tampines Rovers sementara pemain midfield lincah Faris Ramli menyuarung jersi Home United.

3. Lebih ramai pemain setempat

Keputusan pentadbir menurunkan jumlah pemain asing daripada lima kepada tiga turut membuka peluang kepada pemain setempat beraksi.

Beberapa kelab, seperti Geylang International dan Home United telah pun mengorak langkah dan mengekalkan pemain muda atau 'menaikkan' pemain akademi masing-masing ke skuad Liga-S.

4. Jadual perlawanan berstruktur

Sejumlah besar perlawanan musim ini berlangsung dari Khamis hingga Sabtu dengan perlawanan terakhir dijadual pada 28 Oktober.

Jadual ini membenarkan kelab membuat persiapan dengan lebih baik, sementara memberi kelonggaran bagi pasukan nasional berlatih setiap Isnin – tuntutan terbaru Persatuan Bola Sepak Singapura (FAS) musim ini.

5. Peluang amati persiapan bagi Sukan Asia Tenggara (SEA)

Pasukan Garena Young Lions musim ini diketuai penyerang mapan Khairul Amri, tetapi ia tetap pasukan yang dibentuk sebagai persiapan bagi Sukan SEA 2017. Namun salah terkejut jika pasukan yang dianggotai kebanyakan pemain bawah 21 tahun nasional ini bangkit dan memberikan persaingan di luar dugaan, terutama selepas mendapat tajaan rekod \$4 juta.

6. Jermaine Pennant

Kehadiran Jermaine Pennant di Tampines telah memberi suntikan tenaga kepada Liga-S. Pennant, 33 tahun, yang difahami menerima gaji \$40,000 sebulan, ialah pemain paling mahal dalam sejarah Liga-S. Namun, jika bekas bintang Liverpool dan Arsenal ini mampu mencapai potensi di padang dan menarik peminat ke perlawanan Liga-S, 'perlaburan' ini terlalu 'kecil' nilainya.

7. Bakat muda

Dua anak lelaki Fandi Ahmad memimpin angkatan bakat muda yang bakal 'dilepaskan' ke Liga-S musim ini.

Irfan, 18 tahun, dan Ikhsan, 16 tahun, kini menyuarung jersi Home United, bersama pemain remaja lain seperti Mahathir Azeman, 19 tahun, yang pernah menyuarung jersi kelab Brazil Boavista, dan bintang Piala Lion City R. Aaravin.

Kelab lain tidak ketinggalan. Pemain midfield kreatif, Adam Swandi, 19 tahun, masih

menyarung jersi Young Lions, sementara Saifullah Akbar, 17 tahun, yang menghadiri latihan Newcastle Jets tahun lalu, bakal beraksi bagi Tampines.

8. Usah biarkan kelab asing rebut hatrick kejuaraan domestik

Kejuaraan liga diraih Brunei DPMM musim lalu, sementara Albirex Niigata memenangi Piala Singapura dan Piala Liga – kali kedua sejak 2010 apabila kelab asing membolot semua kejuaraan domestik. Perkara ini tidak boleh berulang dan peminat boleh memainkan peranan, memberi sokongan padu kepada pasukan setempat bagi menyahut cabaran ini.

9. Congak keupayaan jurulatih setempat

Beberapa jurulatih setempat kini berpeluang menunjukkan keupayaan masing-masing. Bekas pemain Hasrin Jailani kini memimpin Geylang International, sementara K. Balagumaran telah menggantikan Salim Moin di Hougang United. Raziff Onn pula bergandingan dengan Jorg Steinebrunner di Warriors FC, sementara V. Sundramoorthy (Tampines) dan Philippe Aw (Home) masing-masing telah diberi peluang musim kedua memimpin pasukan mereka ke puncak liga.

10. Peluang 'terakhir'

Musim ini dilihat sebagai peluang keemasan bagi Liga-S bangkit, tetapi ramai juga berasa bahawa ia peluang 'terakhir' bagi liga setempat menunjukkan ia masih kompetitif dan relevan dalam kalendar sukan setempat. Sementara anda memberi sokongan kepada Manchester United dan Liverpool di Liga Perdana England, luangkan juga sedikit masa dan perhatian bagi liga domestik yang memerlukan anda.



Albirex Niigata

Nama gelaran: The White Swans
Kubu: Stadium Jurong East
Kedudukan 2015: 3; (Juara Piala Singapura & Piala Liga)
Jurulatih: Naoki Naruo
Pemain bahaya: Kazuki Mine, Tatsuro Inui



Balestier Khalsa

Nama gelaran: The Tigers
Kubu: Stadium Toa Payoh
Kedudukan 2015: 4; (Wakil Singapura di Piala AFC)
Jurulatih: Marko Kraljevic
Pemain bahaya: Miroslav Krstic, Robert Pericic, Mohd Jamil Ali



Brunei DPMM

Nama gelaran: The Royals
Kubu: Stadium Nasional Hassanal Bolkiah
Kedudukan 2015: 1
Jurulatih: Steve McKean
Pemain bahaya: Brian McLean, Paulo Moreira, Rafael Ramazotti (Penjaring Terbanyak 2015)



Geylang International

Nama gelaran: The Eagles
Kubu: Stadium Bedok
Kedudukan 2015: 8
Jurulatih: Hasrin Jailani
Pemain bahaya: Sahil Suhaimi, Gabriel Quak, Farits Hameed



Home United

Nama gelaran: The Protectors
Kubu: Stadium Bishan
Kedudukan 2015: 6
Jurulatih: Philippe Aw
Pemain bahaya: Faris Ramli, Irfan Fandi, Zulfahmi Arifin



Hougang United

Nama gelaran: The Cheetahs
Kubu: Stadium Hougang
Kedudukan 2015: 10
Jurulatih: K Balagumaran
Pemain bahaya: Fumiya Kogure (Pemain Terbaik Liga-S 2015), Raihan Rahman, Stipe Plazibat.



Tampines Rovers

Nama gelaran: Mighty Stags
Kubu: Stadium Jurong West
(sehingga Stadium Tampines siap akhir tahun)
Kedudukan 2015: 2; (Wakil Singapura di Piala AFC)
Jurulatih: V. Sundramoorthy
Pemain bahaya: Jermaine Pennant, Fazrul Nawaz, Izzidin Shafiq



Warriors FC

Nama gelaran: The Warriors
Kubu: Stadium Choa Chu Kang
Kedudukan 2015: 5
Jurulatih: Jorg Steinebrunner & Razif Onn
Pemain bahaya: Madhu Mohana, Ismail Yunos, Jonathan Behe



Garena Young Lions

Nama gelaran: Young Lions
Kubu: Stadium Jalan Besar
Kedudukan 2015: 9
Jurulatih: Patrick Hesse
Pemain bahaya: Khairul Amri, Firdaus Kasman, Adam Swandi